

## Perspektivna vojna imovina

# Lagumdžija: Ulaskom u NATO BiH bi bila atraktivnija za strane investicije

Ministar vanjskih poslova Bosne i Hercegovine Zlatko Lagumdžija primio je danas komandanta NATO štaba u Sarajevu brigadnog generala Gary Huffmana, a u odvojenim posjetama, susreo se sa ambasadorima Narodne Republike Kine Wang Fuguom, Kuvajta Mohammad Fadel Khalaf H Al-Telaijom, Ujedinjenog Kraljevstva Nigel Caseyem i Crne Gore Draganom Đurovićem.

- Piše: R. H.

Ministar Lagumdžija je upoznao sagovornike sa prioritetima u radu Ministarstva vanjskih poslova Bosne i Hercegovine: punopravno članstvo BiH u EU, NATO-u i razvoj regionalne i dobrosusjedske saradnje.

Govoreći o ulasku Bosne i Hercegovine u NATO, ministar Lagumdžija je rekao da se očekuje rješavanje pitanja perspektivne vojne imovine, kako bi BiH što prije počela sa implementacijom Akcionog plan za članstvo u NATO-u (MAP). Rečeno je da NATO nije samo vojni savez, već i sam ulazak u MAP može imati pozitivan uticaj na ekonomiju. Očekuje se da bi ulaskom u NATO naša zemlja bila atraktivnija za strane investicije, podigao bi se kreditni rejting, a namjenska industrija BiH bi dobila svoju novu šansu. Kada je u pitanju Evropska unija, ministar Lagumdžija je naglasio da je prioritet predati aplikaciju BiH za status zemlje kandidata za članstvo u Evropskoj uniji, a potom raditi na sticanju kandidatskog statusa naše zemlje. Izrazio je uvjerenje da će se uskoro naći rješenje za implementaciju presude Evropskog suda za ljudska prava u Strazburu u slučaju Sejdić-Finci, kako bi se ispunile obaveze koje proizilaze iz članstva BiH u Vijeću Evrope. Kao vanjskopolitičke prioritete ministar Lagumdžija je naglasio regionalnu saradnju, prije svega unapređenje odnosa sa susjednim zemljama.

U razgovorima sa ambasadorima ministar Lagumdžija je ukazao i na mogućnosti daljeg razvoja bilateralne saradnje, posebno u oblasti ekonomije i upoznao sagovornike sa razvojnim i mogućnostima za investiranje u BiH. Ministar je zahvalio stranim ambasadama u BiH na pomoći koje su pružile našoj zemlji u uslovima elementarne nesreće zbog obilnih snježnih padavina.

Ambasador Casey je izrazio uvjerenje da sada postoji konsenzus i da će Bosna i Hercegovina, krenuti odlučnije prema EU, i NATO-u, pri čemu će imati punu podršku Ujedinjenog Kraljevstva. Ambasador Kuvajta je istakao dosadašnja pozitivna iskustva Kuvajta u investiranju u Bosnu i Hercegovinu i najavio



Gary Huffman i Zlatko Lagumdžija (Foto: mfa)

nove investicije posebno u energetske sektor i infrastrukture.

Ambasador Fuguo je rekao da postoji interes kineskih kompanija da investiraju u energetske sektor u našoj zemlji. Ambasador Đurović je ukazao na konkretne mogućnosti saradnje u oblasti energetske sektora i turizma.

(haber.ba)